

第十五冊

宗教
婚姻

清稗類

商務印書館發行

清稗類鈔

杭縣 徐珂 仲可

宗教類

宗教發源於亞洲

宗教者。以神道設教而設立誠約。使人崇拜信仰者也。蒙昧之世。民智未啓。驚天然之美麗。痛生死之無常。不知由來。乃悉舉智識範圍之外。一切歸之於神。而奉祀之。崇拜之。此宗教所由起也。世界宗教之大者。皆發源於亞細亞洲。如猶太教基督教興於猶太。回教興於阿剌伯。婆羅門教釋教興於印度是也。其行於我國者。爲釋教猶太教基督教回教。

宗教之類別

宗教之敬奉一神者。如基督教回教等。曰一神教。我國有之。敬奉多神者。如印度婆羅門教等。曰多神教。我國無之。虛談玄理。不奉一神者。如釋教之本相。曰

無神教。我國有之。任舉一物皆可崇拜者。如番人之拜樹拜蟲。曰敬物教。我國有之。

宗教維繫人心

某居士耽禪悅。信內典。而厭惡僧侶。嘗斥其坐食分利。錢塘徐新華女士則謂工藝不興。游民日衆。託業沙門。亦聊以自贍耳。且分利者世亦甚多。叔季之世。人心日漓。道德法律。皆不足以救世。猶幸有宗教以維繫人心於萬一耳。迷信果盡除。小人亦何所憚而不爲耶。

我國之宗教

我國宗教。向以儒釋道三者並稱。儒家集大成於孔子。爲我國進化之階梯。實則全係學說。不具迷信。固非宗教所能比擬。政府對於各教。亦素無歧視之見。與歐西之標明國教者不同。蓋我國俗尙。上級社會。大都以儒學爲依歸。而旁參佛學之哲理。下級社會。始有神道之信仰。則以釋道回基督四教爲著。若猶太教則微末已甚矣。

歸化有四大宗教

歸化宗教四者具備。喇嘛多滿洲蒙古人。亦有西藏人廁於其列。然城內外佛教之大小昭昭即寺。既甚多。而城北有清真寺。回族頗衆。且城南有關帝廟。道士居之。則道教也。城西有福音天主兩堂。則基督教也。四大宗教。固皆萃於是矣。

河南有三教堂

乾隆初。河南立三教。合釋迦老子孔子偶像爲一殿。立堂五百九十餘處。河南學政林枝春奏。萬世之師。乃屈居釋道之下。舉事不經。誣妄實甚。競施耗產。以蔑典常。請勅該撫嚴行禁止。旋奉旨。令查明通省書院義學。宜於安奉聖像處。漸次奉迎安設。僧道酌令遷於別寺觀居住。其佛老諸像。亦聽其移奉。枝春。字荇浦。

四川有儒釋道三教之壇

四川太平縣有壇。曰聖教壇。以儒釋道三教爲主。凡入教者。遇壇中薦齋薦會時。雖有要事。亦必前往供役。

康熙朝之釋道二教

康熙丁未七月。禮部題爲遵旨議奏事。禮科抄出禮部等衙門題前事奉旨依議。欽此。隨經行文各該巡撫造報去後。各該巡撫陸續報部。該臣等計算直隸各省巡撫造送冊內。勅建大寺廟共六千七十三處。小寺廟共六千四百九處。私建大寺廟共八千四百五十八處。小寺廟共五萬八千六百八十二處。僧共一十一萬二百九十二名。道士共二萬一千二百八十六名。尼姑共八千六百一十五名。以上通共寺廟七萬九千六百二十二處。僧道尼姑共一十四萬一百九十三名。奉旨依議。

釋教

釋教。一稱佛教。創於印度之釋迦牟尼。以開迷覺悟脫俗離欲厭現世超冥界爲宗旨。後漢明帝時。由迦葉摩騰傳入。至中古而大盛。名人輩出。翻譯經典。遂有大藏經全書。分俱舍。成實。三論。法相。攝論。華嚴。天台。密教。淨土。禪宗諸派。淨土禪宗二派推行最廣。淨土乃東晉時慧遠所創。南梁時菩提達摩東來。又創

禪宗與之並峙。其後分爲臨濟曹洞雲門法眼黃龍楊岐。爲仰等派。晚近以來。臨濟一派。獨占勢力於全國。論其內容。實爲淨禪二宗所混合也。

寺院徧郡邑。供奉文殊普賢釋迦觀音諸像。晚近信徒。多乏知識。但業懺懺爲生計。男稱僧。女稱尼。惟人情每不能脫然於生死之際。故中下社會。仍多信之。用以治喪。外人遂稱我國爲佛教國。其實漢族於此。遠不及蒙藏二族信奉喇嘛教之篤也。

釋教徒之神話

藏人嘗謂佛教入藏之初。其地全係高山窮谷。大港巨湖。居民皆猴而非人。時釋迦牟尼游其地。見之。問衆猴曰。何未成人而從吾教乎。衆猴曰。此間地勢如此。難以成人。成人後。恐難生活。又焉能誦習貴教耶。釋迦曰。爾等倘能成人而從吾教。則吾賜爾肥沃之地。以資食息。衆猴唯唯。釋迦卽鑿地穴於喜馬拉雅山下。并設運河以通印度北恆河。而湖港各流。自是均入運河。成爲介安子大平原。衆猴見之。大驚。頃刻卽化人身。從佛教。流傳以逮今日。或曰。今之達賴班

禪兩喇嘛。爲最大兩猴之化身。擬之於獸。尊之而實褻之也。

世祖崇信竺乾

世祖崇信竺乾。每於西苑。禮接高僧。登座說法。嘗迎玉琳禪師。入都供養。從玉琳乞命名。因名曰慧橐。而以山臆爲字。幼庵爲號。各鐫玉章。凡御製書畫。輒用之。一日。復欲取別號。命玉琳擬數十字以進。并諭玉琳。其字義須含有不美之意者。將因號以自警。玉琳遵擬數十字。世祖親取癡字。因號癡道人。玉琳語錄編首。刊有世祖御筆答詔。卽爲取號事也。詔末自署弟子癡道人。下鈐篆文癡道人三字。長方小璽。

聖祖深通內典

聖祖深通內典。南巡時。嘗與諸老宿相印證。所幸名利。輒灑宸翰。木陳和尚。名道忞。主天童法席。聖祖禮迎入都供養。後封宏覺國師。有北游集。

高宗詔譯佛經

乾隆時。高宗以舊譯佛經。多失本真。詔開清字經館。以唐古忒文譯西番文。又

以蒙古文譯唐古忒文。再以滿文譯蒙古文。於是往之眞面目始出。又仿譯經潤文之例。董以親王。總以章嘉國師。置翻譯生若干員。金剛經之如夢幻泡影。如露亦如電句。原本甚冗長。凡十數句。唐人譯本節之耳。又西藏獨無楞嚴經。章嘉國師乃以唐古忒文譯之。俾流布於藏中。

喇嘛教

喇嘛教爲釋教別支。有紅教黃教二大派。又有黑教。其教徒狡悍陰鷙。飲酒食肉。被服鮮麗。娶婦女。無戒律。其演法則有跳布札放鳥卜藏諸技。其唸經則有吉祥天母大遊戲迎新年龍王水寶匣沐浴諸名目。其皈依釋迦金剛毗盧藥師無量壽諸佛。則類浮屠。其髡首不蓄髮亦同。定例。凡祈禱雨雪。救護日月食。皆令演法唸經。而長年承應內廷者。至數十百人之多。出則橫行街市。莫敢誰何。糜帑惑民。於義無取。蓋國初喇嘛效順最早。而其術盛行東土。又夙爲蒙古諸部落所崇信。故優禮之。藉以羈縻外藩也。

紅教

紅教喇嘛髮長及地。纏以紅布。盤於頂。其迎迓高等喇嘛時。則戴大笠。挽髮爲高髻。以笠罩之。笠頂甚高。有刻佛像者。則從西藏受戒來。否則無之。其經典與黃教大半相同。惟其中別有一派。尙法術。能咒刀入石。復屈而結之。又能呼風雨。役鬼神。

黃教

黃教喇嘛惟誦經典。習靜禪坐。不爲幻法。而諸邪不能侵之。故蒙藏人之敬禮黃教。輒重於紅教焉。

黑教

自黃紅二教外。又有黑教。其喇嘛率多妻。茹葷飲酒。專以邪法爲生活。皆居於家。

白教黑教

青海之柴達木多寺院。最大者曰都藍寺。佛法經典。又較青海東部各寺爲高。僅亞於西藏。異僧不時出焉。僧家持戒律。誦藏經。務求實際。不似沿邊僧寺。徒

襲法台僧綱之虛名而已也。其間各有等級。曰格楞者。明字母。能諷經者也。曰格錫者。經明行修者也。曰喇嘛者。由藏考試及格。錫以名。謂慧性不滅。能以靈魂傳至再世。卽所謂轉生是也。進而上之曰呼圖克圖。則惟國家特封名號。建有專寺。始克世襲者也。此外有熱主巴者。番僧家稱爲修行士也。以誦經講解禪定爲宗旨。亦有著書立說。以自陳其所學者。其中又有學博名高。僧徒從學。自數十人至數百人。遠近蒙番。爭輦貨財器物食用。奉佈施以表誠敬。光宣間。柴達木有夏莽者。僧俗咸尊之爲佛。數千里外皆仰重焉。此則韋布之士。無位而貴。無祿而富。不藉錫名封號。以積學爲高者也。

其宗紅教者。俗名本卜子。類多怪誕之說。如問卜醫病。禱雨迴風。及咒人畜吞刀火等事。率稱奇驗。土人篤信之。久且諱其短。炫其長。黃教不認其爲同派。拒而遠之。幾如冰炭之不相容。更或奴隸視之。役之而爲近侍。從前紅教爲舊教。黃教爲新教。晚近則號黃教爲白教。紅教爲黑教。明其衣鉢非眞也。

紅黃二教分界念經

麗江中甸有喇嘛數千餘人。至自西藏。分紅黃二教。歸化寺有黃教二千餘人。承恩寺有紅教四十人。黃教恃衆凌之。紅教莫如之何。嘉慶己未冬。紅教收四徒。黃教從而訐之。率徒二百人赴紅教廟。欲強新徒歸黃教。幾至生變。署同知陳務本號誠齋。城守李上林號文囿。率兵五十名。先逮新徒四人。並捕大喇嘛一及其五品官教沙二。六品官康干八。訊之。無狀。陳欲重責大喇嘛。時營官二員。神翁五員。兵把十六員。侍立。齊跪求哀免。久之始允。營官神翁兵把。卽內地土守備土千總土把總也。陳再詢教沙等。各杖一百。蓋自雍正丁未改土歸流以來。歷任養癰。故喇嘛乃愈橫。而誠齋乃將滋事有品級喇嘛十人。各杖一百。始無事。其後誠齋詳由滇督。牒告西藏辦事大臣。移知達賴喇嘛。達賴乃札知黃教。分紅黃二教地界。打鼓念經。仍准紅教收徒。爭乃息。

紅教先於黃教

紅教之成立。先於黃。蓋明代諸法王皆賜紅綺禪衣。號爲紅教。其後專以吞刀吐火炫俗。無異師巫。有宗喀巴一名羅巴者。深觀時數。當改立教。卽會衆自黃

其衣冠遺囑二大弟子。世世以呼畢勒罕轉生。演大乘教。呼畢勒罕者。亦曰大力克。華言化身也。二弟子。一曰達賴喇嘛。一曰班禪額爾德尼。達賴者。梵言海。謂其智慧法力如海也。喇嘛者。喇之義爲上。嘛之義爲無。華言無上。猶云上也。皆死而不失其通。自知所往生之地。諸弟子親迎而立之。第一世曰敦根珠。第二世曰根敦嘉穆錯。第三世曰鎖南嘉穆錯。是時黃教益盛。紅教中大寶大乘諸法王。皆改從黃教。化行諸部。東西數萬里。熬茶膜拜。視若天神。諸番王徒擁虛位。不復能施其號令。第四世曰雲丹嘉穆錯。第五世曰羅卜藏嘉穆錯。崇德丁丑。喀爾喀三汗奏請發幣使。延達賴喇嘛。己卯。因厄魯特使貽達賴書。達賴亦遣使至盛京。獻書貢方物。順治壬辰。達賴朝京師。世祖賓之於太和殿。建西黃寺居之。封西天自在大善佛。領天下釋教。康熙壬戌。第五世達賴卒。其徒弟巴欲圖國事。託言達賴入定。居高閣。不見人。事皆決於第巴。其後恐事發。乃擁立假達賴。是爲第六世。青海諸蒙古人皆不信。而別奉裏塘之噶爾藏嘉穆錯。卽康熙壬子所勅封者也。噶爾藏嘉穆錯。卽新胡必爾汗。是年二月。聖祖詔

封新胡必爾汗爲宏法覺衆第六世達賴喇嘛。派滿漢官衆及青海官兵送往西藏。

或曰。宗喀巴有三弟子。曰達賴喇嘛。曰班禪額爾德尼。曰哲布尊丹巴。達賴居前藏之拉薩。班禪居後藏之日喀則。哲布尊丹巴居外蒙古之庫倫。皆號稱世世轉生。輪迴不已。

呼圖克圖

呼圖克圖。卽再來人。明史所謂尙師也。其名號本起於紅教。紅教喇嘛最尊者爲薩迦呼圖克圖。卽元帝師帕斯巴喇嘛之後。黃教之祖宗喀巴。其始亦受經於薩迦廟之呼圖克圖。其大弟子達賴喇嘛。又有二弟子。亦名呼圖克圖。一曰濟隆。一曰第穆。分掌教化。每當達賴圓寂。班禪或呼圖克圖可代理印務。明隆慶後。稱胡土克圖。其名稱流播於青海漠南北蒙古等處。大喇嘛學道能轉世者。則達賴班禪印證之。得爲呼圖克圖。又有尊而上之曰大呼圖克圖者。如漠北之蒙古喇嘛。皆以轉生嗣位。或受中朝封號。至國朝。凡自稱呼圖克圖者。皆

錫名號。俾其世世掌教。又有修行未深初轉一二世者。曰沙布倫。亦得建專寺。綜計喇嘛之能出呼畢勒罕入理藩院冊者。西藏號呼圖克圖者十有八。號沙布倫者十有二。漠北蒙古十有九。漠南蒙古五十有七。青海番地三十有五。四川察木多番地五。又駐京呼圖克圖十有四。都凡呼畢勒罕百六十人。惟青海諾們汗一支。久同世襲。許以親族入籤。其後又調取西藏青海漠南北蒙古察木多之呼圖克圖。輪流駐京。擇其道行高者使掌印。三歲而更代。

四大活佛

達賴喇嘛班禪額爾德尼哲布尊丹巴之外。有章嘉。合之。則爲四大活佛。活佛。卽呼圖克圖也。其下尙有八大家。亦有呼圖克圖名號。

章嘉

元明兩代。均封章嘉活佛爲大國師。頒有敕書。本朝尤加以敬禮。故亦以大國師封之。並授以金印金冊誥敕等件。

金奔巴瓶掣籤

裏塘之噶爾藏嘉穆錯爲眞達賴。卽聖祖勅封之宏法覺衆第六世達賴喇嘛也。與藏中所立互相是非。高宗令暫居西寧紅山寺。旋移塔爾寺。蓋宗喀巴有一花五葉之讖。故自六世以後登座者。無復眞觀密諦。僅憑垂仲降神指示。垂仲者。猶內地師巫也。高宗久悉其弊。欲革之而未有會也。乾隆壬子。乘用兵之後。特定辦法。創頒金奔巴瓶一。供於中藏大昭之吉祥天母前。遇有呼畢勒罕出世。互報差異者。則納籤於瓶。誦經降神。大臣會同達賴班禪。於宗喀巴像前掣之。而各札薩克所奉之呼圖克圖。其呼畢勒罕將出世。亦報名理藩院。與住京之章嘉呼圖克圖掣之。瓶供京師雍和宮。

或曰。達賴喇嘛班禪額爾德尼。率言永遠轉生。以嗣其教。行之日久。徒衆稍有道行者。亦踵其轉生之說。以致呼畢勒罕多如牛毛。蒙古王公有利其寺之貲產者。輒言於達賴喇嘛。指其子姪爲的乳。互相承授。遂與世爵無異。高宗深知其弊。因習久難革。故有金奔巴瓶之作用。遇有呼圖克圖圓寂者。卽揀是歲所產之聰慧者。書名於籤。令達賴班禪會同駐藏大臣封名掣之。弊始絕。時謂爲

活佛掣籤。

或又曰。必逾十五齡。而後選定。且或同時有二人以上。有被選資格者。

敕封活佛印冊

國初。達賴喇嘛班禪額爾德尼入覲。大抵皆賜金印金冊。或玉印玉冊。第七輩

達賴喇嘛有金印玉寶。其金印文云。敕封西天大善自在佛統領一作總理天下釋

教普通瓦一作日赤拉坦一作坦喇達賴喇嘛之印。玉印文同。惟印字易寶字。又有

金冊玉冊。玉冊長六寸餘。寬約四寸。頁厚二分。邊刻龍文。面鏤敕封達賴喇嘛之玉冊。冊之字有四體。四體者。前漢文。次唐古忒文。次蒙古文。最後爲滿文。滿文右行。實則先滿文。次蒙古文。次唐古忒文。最後爲漢文也。冊凡十五頁。不相聯。金冊大小如之。亦十五頁。而聯其腦。如展書然。皆以紫檀木座盛之。若班禪額爾德尼。則有金印金冊而無玉印玉冊。

活佛傳鉢

達賴喇嘛將死。能不迷其本性。預言某月某日。託生於某所。始墮地。卽能自言。

前生諸弟子乃載其生前念珠鉢往。中雜以平時所用物數十具。置嬰兒前。兒諦視久。徐伸手。拈其前生服御物。摩挲不忍釋。餘置不顧。乃諷日奉之歸。是爲傳鉢。

活佛過境之供應

乾隆庚子。哲布尊丹巴呼圖克圖之呼畢勒罕。自西藏至庫倫坐牀。由朝廷特遣大臣蒙古王等迎接。兵部頒給路票。從者五百餘人。由精依口界行走。至庫倫熬茶。呈進丹書克等項。呼圖克圖商上出銀四萬兩。四部落札薩克出銀一萬兩。汗王札薩克等出銀一千兩。伙助至青海。寄留人馬馱隻。至呼畢勒罕受戒。由班禪額爾德尼教授。又以沿途西寧四川所屬岷安果羅克番子惡賊等行劫可慮。派兵護送。俗稱活佛過境。殊可觀也。

喇嘛爲呼圖克圖誦經

光緒朝。青海東科寺呼圖克圖圓寂。靈前所陳。有高椅並袈裟一襲。案旁牟尼一串。皆呼圖克圖生前所御者也。數喇嘛披袈裟。坐地誦經。階前掛招魂幡。皆